

Obraćanje predsjedatelja Doma naroda Bariše Čolaka na 13. Konferenciji predsjednika Parlamenata zemalja članica Jadransko-jonske inicijative

Neum, 23. travanj 2015.

POVEZIVANJE REGIJE U CILJU JAČANJA ODRŽIVOG TURIZMA

**Uvažene kolege parlamentarci,
Poštovani učesnici Konferencije
Dame i gospodo,**

Veoma me raduje odabir teme za današnju Konferenciju koja nam daje mogućnost elaboriranja i međusobne razmjene mišljenja i iskustava o turizmu, u novije vrijeme jednoj od značajnijih privrednih grana u svim zemljama naše regije ali i šire. S pravom možemo konstatovati da je turizam postao fenomen koji je poprimio globalne dimenzije u današnjem vremenu. Stručnjaci i posebno analitičari ove privredne grane predviđaju da će turistička industrija za par decenija biti, takoreći „rame uz rame“ naftnoj i automobilskoj industriji.

Govoriti o turizmu znači imati viziju i predstavu određenih destinacija koje zainteresovanim putnicima i znatiželjnicima pružaju mogućnost sopstvenog uvjeravanja i sopstvenog doživljaja određenih kulturnih, povijesnih, prirodnih, antropoloških značajnih mjesta. Poznato je da za formiranje imidža i svijesti turističkih potrošača često presudnu ulogu imaju uticaji promotivne aktivnosti, preporuke prijatelja, rodbine, kao i socio-ekonomski ambijent, psihološki profil ličnosti, kultura ..

Želim vam ukratko kazati nekoliko značajnih podataka o imidžu Bosne i Hercegovine i njenim turističkim mogućnostima.

Nije neskromno reći da naša zemlja, s izuzetno povoljnim geografskim položajem ima prelijepu okolinu i prirodne atrakcije, od plaža na jedinoj jadranskoj rivijeri, ovdje u Neumu, do prelijepih olimpijskih planina koje okružuju Sarajevo, na kojima usput budi rečeno, još i danas traje skijaška turistička sezona.

Na ovim našim prostorima, a nigdje više nego u Bosni i Hercegovini, kroz historiju susretali su se različiti kulturno – etnički identiteti te ostavili svoj dubok trag na ovom svojevrsnom raskrižju puteva između Istoka i Zapada. Kao rezultat toga kulturno – historijsko nasljeđe Bosne i Hercegovine jeste veliki magnet za privlačenje stranih i domaćih turista. Dopustite mi da iz te bogate riznice kulturno – historijskog nasljeđa, a kao čovjek koji dolazi iz tog kraja, izdvojim Stari most u Mostaru koji je pod zaštitom UNESCO-a, a kojeg godišnje posjeti oko milion turista.

Posebno se želim osvrnuti na izuzetno značajan i sve popularniji oblik turizma, koji i BiH dovodi u fokus najznačajnih u ovoj grani, a to je vjerski turizam. Međugorje je postao svjetski fenomen sa prilivom turista iz svih zemalja svijeta u kojima žive katolici. S tim u ovaj dio Hercegovine stižu i nove mogućnosti za proširenje kapaciteta, poboljšanje ponude i kvaliteta života stanovnika ovog područja.

Svi potencijali za razvoj i unapređenje turizma i turističke ponude uopšte, nisu dovoljni u onoj mjeri koja bi zadovoljila probirljivu klijentelu, ukoliko ne postoje i drugi segmenti potrebni za realizaciju posjeta određenim i željenim destinacijama. Negativnosti koje utiču na stvaranje loše slike o BiH i bacaju sjenu na njene pozitivne karakteristike jesu još uvijek nedovoljno izgrađena infrastruktura te određeni problemi političko-ekonomske prirode.

Napori koje Bosna i Hercegovina ulaže posljednjih godina u izgradnji saobraćajnica, osavremenjivanju željeznica su jasno vidljivi, omogućili veću fluktuaciju i ljudi i dobara, kvalitetniji prijevoz, ali i doprinijeli da se i na određeni način poboljša približi krajnim korisnicima turistička ponuda pojedinih krajeva BiH.

Ovom prilikom želim izraziti lično zadovoljstvo usvajanjem EUSAIR strategije, Strategije Europske unije za Jadransko-jonsku regiju koja se prirodno razvila iz pozitivnog iskustva međuvladine suradnje kroz Jadransko-jonsku inicijativu i koja promovira ekonomski rast i prosperitet u regiji poboljšavajući njenu privlačnost, kompetitivnost i povezanost, kao i bolju integraciju država koje još nisu članice Europske Unije. Također, zaštita će jedinstveni morski, obalni i kopneni okoliš i eko- sistem. Za nas u Bosni i Hercegovini ova je strategija značajna i s aspekta njene organiziranosti, obzirom da regulira i podstiče povezivanje regije, podupire unapređenje kvaliteta okoliša i održivog turizma te promovira plavi rast.

Poštovane dame i gospodo,

Evropski put Bosne i Hercegovine i realizacija uslova za pristupanje evropskoj porodici naroda je naš prioritet. U tom smislu je 28. februara 2015. godine, prema zaključcima Vijeća za vanjske poslove Evropske unije potpisana Izjava o provedbi neophodnih reformi za uspostavu funkcionalnosti i efikasnosti na svim nivoima vlasti kojima bi se omogućila adekvatna priprema BiH za buduće članstvo u EU.

Ovim se korakom BiH dovodi u priliku, da ponovo bude kandidat za korištenje fondova Evropske unije koji bi, uveliko bili pokretač razvoja turizma, ali i drugih privrednih grana , toliko potrebnih na našim prostorima.

Duboko sam uvjeren da mi parlamentarci možemo svojim angažovanjem kroz razne inicijative ali i putem parlamentarne diplomacije doprinosti unapređenju mnogih aktivnosti koje u konačnici donose bolji i sadržajni život svim našim građanima.

Želim svima, a posebno nama u regiji koji još uvijek nismo osjetili blagodeti evropske porodice, bolju i perspektivniju budućnost, ali i dobre odnose na svim poljima ubuduće.

Hvala vam lijepa.